

# I dovrà exempels

DA MARIA CADRUVI

■ Eva, ina dunna da la Germania, era s'annunziada per in curs da linguatg tar la Lia Rumantscha. Suenter la segunda lecziun hai jau entupà Eva ch'ella era indignada. En lur cudesch d'instrucziun stettia scrit «la cuschina ei il reginavel dalla mumma» – «das ist doch unerhört, so was in der heutigen Zeit!» Capità è quai avant passa 30 onns. Jau hai manejià lezza giada che per bleras dunnas, tant en Germania sco en Svizra, saja la cuschina propi lur reginavel. En sasez na saja quai gea nagut schlet u da pauca valita.

Ma jau hai stuì dar raschun ad Eva. Talas frusas en cudeschs d'instrucziun «gidan» a cementar tals purtrets en noss tscharvè. Las rollas èn repartidas e fixas. Quests schemas influenzeschan il svilup individual e la percepsziun en la societad. Tut segund tip e caracter elegia ina persuna giuvna sia professiun tenor il model usità ed enconuscent ed organischescha era sia vita privata tenor quest muster. I mancan auters exempels, da quels che animeschan da patratgar anc ad autras pussaivladads. Exempels, Vorbilder, avran l'orizont, dattan curaschi e promovian visiuns.

Da mes temp da scola era l'um il medi e la dunna la tgrunza, l'um il director e la dunna la secretaria. Chasarins e tgrunzs, giuristas e chemicras eran lunsch davent da quai ch'jau m'imaginavel. Per cletg èn quests temps passads. Giuvens e giuvnas, era da valladas perifericas, han oz la pussaivladad da sa scolar tenor lur bramas e lur talents. Ed oz avain nus dunnas capablas en (quasi) tut las domenas. Mintgatant procura ina spazzachamina u ina pilota militara l'emprim mument anc per in zichel irritaziun u almain smirvegl en noss tscharvè, perquai che quel n'ha betg arcunà anc maletgs da dunnas cun questas professiuns. Ma atgnamain èn numerusas portas s'avertas per las dunnas ils davos decennis. Cler, nus avain anc bler potenzial da svilup envers ensi – en las etaschas dals schefs, a las universitads, en parlaments e regenzas. Ma pli bleras dunnas ch'i dat er en questas domenas e pli «usità» che quai daventa, era per il bun dal bainstar public. E lura sa tant ina dunna sco er in um dir cun plaschair e luschezza «la cuschina è mes reginavel».

**L'autura è pensiunada e giada che ses um cuschina gugent ed almain tant ed uschè bain sco ella.**

